



*RESPONSE AV FACTVM DE  
Monseigneur l'Eminentissime Cardinal de Lyon,  
par Monsieur Payen Conseiller au Parlement, &  
Prieur Commandataire du Prieure de Nostre Da-  
me de la Charité.*



15  
L y a lieu de s'estonner que Monsieur le Cardinal de Lyon, qui tient son droit tellement indubitable qu'il en trouue la contestation inciuile & temeraire, affecte d'en oster la connoissance aux Iuges naturels; Déroge au Priuilege de l'Ordre de Cluny; Vueille donner atteinte à l'vsage le plus constant, & aux maximes les plus certaines, au mespris des Arrests, des Ordonnances, & des Loix fondamentales de l'Estat; Et apprehende de sousmettre ses raisons au jugement d'une Compagnie establee pour ces Matieres, authorisée par vn renuoy general à la decision des differents de l'Ordre de Cluny; Que luy-mesme auoit reconnuë, & qu'une vieille experience a renduë comme infailible; Le tout sous couleur d'un reglement de Iuge entre le Parlement & le Grand-Conseil, qui est purement imaginaire, & qui a toute extremité ne pourroit operer qu'un renuoy en l'une ou en l'autre de ces deux Compagnies.

Aussi l'Arrest du Priué-Conseil du dix-neufiesme de Ianuier, mil six cens quarante-quatre, ne portoit qu'une Ordonnance de faire assigner les Parties; & ce pendant surcis: Mais Monsieur le Cardinal de Lion ayant bien veu qu'il ne pouuoit éuiter le Renuoy, il à luy-mesme présenté Requête d'Euocation à la personne du Roy, & surprenant la religion de la Reine, comme s'il ne s'agissoit que d'une chose de legere consequen-





ce, a obtenu Arrest, par lequel sans ouyr les Parties, il a esté ordonné que les Parties seroient oüyes sommairement par-deuant les Commissaires y desnommez.

Et cela sous pretexte qu'en l'année mil six cens vingt-deux, contestation s'estant meüe pour le mesme Prieuré, entre le feu Prince de Mantouë fils, & Dom Iean Michel Religieux de Cluny, Elle y fut éuquée de leur consentement, & jugée au profit de Messire Charles de Gonzagues sur l'acquiescement de la Partie mesme.

Si bien que si Monsieur le Cardinal de Lion en vertu de cet Arrest a pû légitimement faire éuquer à la personne du Roy, tous les futurs Titulaires auroient le mesme Priuilege; Toutes les Compagnies seroient à jamais excluses de connoistre du Prieuré de la Charité; Et sa Majesté en deuiendroit le seul Iuge necessaire.

Toutesfois en l'année mil six cens trente que ce mesme Prieuré estoit contentieux en diuerfes Iurisdctions; Qu'une Instance estoit pendante au Parlement, & l'autre aux Requestes du Palais; Que la diuersité des Instances & des Iurisdctions donnoit vne ouuerture entiere au Reglement de Iuge; Monsieur le Cardinal de Lion ne demanda point d'éuocation à la personne du Roy; Au contraire negligant alors l'autorité du premier Arrest: Il se soumit volontairement à la Loy commune, aux Iurisdctions ordinaires, & se seruit vtilement de l'absence de Monsieur Payen.

Mais ce qui donne vn grand soupçon, voire vne assurance toute entiere que son droit luy paroist moins certain aujourd'huy qu'il ne faisoit alors; & que les maximes & l'experience des Compagnies souueraines luy ont fait naistre des doutes en l'esprit; C'est que luy-mesme les auoit reconnues pour Iuges, & que par vn prejudé de sa mauuaise Cause, il a fait incidemment appeler en sommation Passelaigue, & l'a fait assigner au mesme Grand-Conseil pour luy remettre l'Euesché de Bellay, & l'Abbaye d'Ambie, qu'il a eus en eschange du Prieuré de la Charité; Ce qui establissoit également & la Iurisdiction du Grād Conseil, & l'abandonnement de ses pretentiōs.

De sorte qu'après vne reconnoissance, & vne soumission si volontaire, il est difficile de penetrer dans le dessein de cette



Euocation, où les questions de Droit qui se presentent à juger, demandent des Juges consommez dans ces maximes, & où l'embarras de la matiere ne peut former que des doutes dans les esprits, & des scrupules dans la Conscience de leurs Majestez.

C'est donc plustost pour justifier cette Verité que pour se deffendre dans le fonds que Monsieur Payen est obligé d'en coter quelques raisons sommaires, afin que son silence ne donne pas à Monsieur le Cardinal de Lion les mesmes avantages qu'il a pris autresfois du malheur de son esloignement.

Monsieur Payen a deux droits, celui de Cottan, & celui d'Edeline; Mais il n'estime pas que personne ait droit de luy dire qu'il en ait eu cession *par des reconnoissances assez notoires & fort peu canoniques*. Cette obscurité est injurieuse, & meriteroit bien que celui qui a fait le Factum de Monsieur le Cardinal de Lion en esclairsist la verité, ou qu'il en souffrist le blasme; Cette atteinte est d'autant plus sensible qu'elle s'attache à l'honneur & à la conscience, & fait d'autant mieux voir le dessein de l'offence qu'elle est inutile au principal. Mais comme Monsieur Payen voit que sa conduite est assez approuvée, & que sa qualité est assez considerable; il appelle de ce jugement à celui du Public, & de l'indiscretion du Secretaire à la sagesse du Maistre.

Les prétentions de Cottan n'ont besoin d'estre examinées que pour faire voir que Passelaigue n'a jamais esté triennal Possesseur, Et que Monsieur le Cardinal de Lyon qui publie en auoir vne plus que quatre fois triennale, estant aux droits d'un autre qui n'en eut de sa vie, non plus que de Tiltre legitime; sa prétention est tout a fait debile & mal appuyée.

Il suffit d'examiner si le droit d'Edeline estoit suffisant, & de voir s'il y auoit ouuerture au Deuolut. En cela l'affaire est d'autant plus facile à juger, que les Parties sont d'accord de leurs faits, & qu'en vn besoin, Monsieur Payen s'en pourroit rapporter au Factum de Monsieur le Cardinal de Lyon qui aduouë franchement, la Confidence de Passelaigue & de Monsieur le Prince de Mantouë fils.

Mais il est bien estrange que Monsieur le Cardinal de Lyon, apprehendant de se jeter dans cette question pour se desue-



lopper de ses difficultez, croye y'pouuoir satisfaire par vne fin de non receuoir, & qu'il allegue que l'Instance des Requestes du Palais d'entre Edeline & Passelaigue *est demeurée perie, & parant que le droit soit esteint.*

Premierement l'Instance n'est pas perie avec Edeline; La peremption a esté acquise contre Monsieur Payen subrogé aux droits d'Edeline, par le malheur de son absence, laquelle par sa glorieuse justification, & par la place qu'il occupe maintenant à la Grand'-Chambre, le met au nombre des Personnes spécialement priuilegiées; Et cette absence a esté capable d'empescher toute sorte de peremption.

En second lieu la peremption d'une Instance n'est pas vne extinction du droit s'il n'y a prescription; Ce n'est qu'une extinction de la procedure, dont on est quitte pour la recommencer de nouveau.

Ces obstacles estant leuez, reste d'examiner la pretention d'Edeline.

Il est constant que Messire Charles de Gonzagues a esté paisible Titulaire dudit Prieuré; & que le dix-huictiesme d'Avril, mil six cens vingt-cinq, il a passé vne Procuration en faueur de Dom-Jean de Passelaigue Religieux de l'Ordre de Cluny, & Prieur Claustral du Prieuré de la Charité, avec vne reserue de huit mille liures de pension.

Monsieur le Cardinal de Lion demeure d'accord *que le lendemain dix neufiesme elle a esté reuocquée; Que la Reuocation a esté signifiée à Passelaigue & par luy acceptée;* Et quand elle ne l'auroit pas esté, ne sçait on pas que toute Reuocation auparauant la Resignation admise, annule les prouisions & les rend inualides? à plus forte raison quand la Reuocation est acceptée, & que le Resignataire s'est imposé luy-mesme la necessité (comme a fait Passelaigue) de ne point posseder, & de n'estre point pourueu.

Et de fait si depuis la Reuocation, Monsieur le Prince de Mantouë fils fust decedé; mesme après la Resignation admise au prejudice de la Reuocation; Il est sans difficulté que le Benefice eust vaqué par mort; Et pour faire que Monsieur le Prince de Mantouë fils ne fust pas demeuré le veritable Titulaire; il faudroit, ou qu'il eust passé vne nouvelle procuration, *ad resignandum*, ou qu'il eust tout au moins reuocqué en



bonne forme la Reuocation du dix-neufiesme.

Encore seroit-ce vne difficulté de sçauoir si la Reuocation de la Reuocation auroit vn effect retroactif, & si elle pourroit faire reuiure la Resignation, laquelle par la maxime de toutes les dispositions canoniques a esté esteinte par la Reuocation; notamment la Reuocation ayant esté acceptée, qui reduit l'affaire aux termes de cette Regle, que *resignatio pro infecta habetur, si Resignatarius eam repudiat*. Or il n'y a point de plus authentique, ny de plus solennelle Repudiation que l'acceptation de la Reuocation dont il s'agit. Doncques n'y ayant eu ny nouvelle Resignation, ny Reuocation de la Reuocation, il s'ensuit que le Tiltre est demeuré en la personne de Messire Charles de Gonzagues qui a donné vne ouuerture toute entiere au deuolut par la celebration de son Mariage.

Monfieur le Cardinal de Lyon respond, *Que cette Reuocation a este cachée vingt cinq ans; Que Messieurs de Mantouë Pere & Fils y ont derogé par actes posterieurs; Que Passelaigue a pris possession à leur veu & à leur sceu, en la presence des Officiers des Lieux; Qu'il a receu des Lettres de conioiſſance de Monsieur de Mantouë; Fait des eschanges avec luy en cette qualité, assisté au Chapitre General; admis des Religieux à la profession; payé les ar-rerages de sa Pension; Et que le Prince de Mantouë desirant conseruer sa pension nonobstant son Mariage, a obtenu vn bref du Pape en Nouembre mil six cens vingt-sept; Et en fin il aduouë franchement la Confidence quand il dit, Que la Reuocation n'auoit esté faicte que pour tenir Passelaigue en despendance de la Maison de Mantouë.*

Mais il n'y a qu'à sçauoir si Messieurs de Mantouë pour auoir agréé cette action; pour n'auoir point contredit ny debatù le tiltre, ont pû le rectifier; & si tous ces actes posterieurs ont peu faire que la Reuocation n'ait pas esté faite. Veritablement si après vne triennale & paisible possession de Passelaigue Monsieur le Prince de Mantouë fils, luy contes-toit le tiltre, ces objections y formeroient plus de doute; Mais à l'égard d'un tiers qui fonde son action sur ces mesmes raisons, il seroit fort estrange qu'il le prist à garant, & qu'il fist sa protection d'un sujet de sa ruine.

Car quand Monsieur le Prince de Mantouë n'auroit point contracté de Mariage; la Confidence estant si bien justifiée,



& si ingenuëment confessée par le Factum, le deuolut ne receuroit difficulté quelconque.

Et mesme ayant eu peur qu'on n'en doutast, il en a voulu plus fortement imprimer la creance, & prendre la peine de la justifier par les circonstances qu'il a remarquées, de la *soustraction de la reuocation; de l'expedition des Bulles dont Edeline Pere, Intendant de la Maison de Mantouë auoit chargé l'Huillier Banquier; les auoit retirées, payé les frais, & remises entre les mains de Passelaigue.*

Qui sont autant de conuictions de la Confiance qui seule pourroit donner ouuerture au deuolut sur le Prince de Mantouë, ou bien sur Passelaigue.

Après cela Monsieur le Cardinal de Lyon dira tant qu'il luy plaira, *Que Passelaigue a esté Titulaire canonique, et paisible Possesseur, Personne de vertu & de merite singulier, qui auoit canoniquement remply le Benefice de droit & de fait.*

Mais cette estime s'accorde mal avec la Confiance qu'il luy reproche & qu'il a justifiée; La paisible Possession avec deux complaints en trois ans; Et la Prouision canonique avec la soustraction de la Reuocation.

Quant à la Possession de quatorze ans que Monsieur le Cardinal de Lyon allegue en sa personne; s'il en veut, comme il est raisonnable, rabatre le temps de l'absence de Monsieur Payen, causée pour luy rauir ce mesme Prieuré; il n'aura pas vn mois de Possession paisible.

Après quoy, toutes les pretentions justement balancées, on trouuera que Monsieur Payen ne manque ny de raison, ny de bon droit; & qu'il n'y a pas lieu de dire *qu'il ne conserue pas beaucoup de defference, ny de respect* dans vne saison où tout le monde a la liberté de se deffendre, quand il taist les choses passées, dont le Public n'a perdu, ny le ressentiment, ny la memoire; Et Monsieur le Cardinal de Lyon ne doit point faire reuiure les idées de l'oppression qu'un Siecle plus heureux & plus équitable à condamnées.

*Monsieur DE LA MARGVERIE, Rapporteur.*

